

TITO

San Pablo wakára'ari marí puráka'aloji Títójlo i'imaká

1 ¹Tupana wa'até jápajeri nuká; Jesucristo i'iwapakarena rijwa'atéjenawa penaje nakiyana kaja nuká. Riwakára'a nu'ujnaká riyukuna i'imajé ajopánajlo, ajopánajlo ke, kaphí napechu i'imakáloje richojé raú, wa'até nawe'epíkaloje kewákaje puráka'aloji nakoje. ²Ripalamane ra'apiyá jema'ajeño i'imajeño matajnako rijwa'até je'echú chu, rimaká nanaku ke. Ilé ke rimaká nanaku i'imaká, unká chiyó rikeño'ota eja'awá; unká wani pajlákachi kalé Tupana, kewaka rimaká. ³Chuwa, kaja riphá rená chojé, ñakele chuwa ra'á pu'uwaká riyukuna wajló, raú wawe'epíkaloje rinakoje penaje. Riká we'ematajjeri, wakára'ari nuká riyukuna i'imajeri penaje. ⁴Tito, pijló nuwakára'a marí puráka'aloji. Nujewemi pikeño'ó Jesucristo ja'apiyá jema'akana i'imaká; chuwa, kaja pajñakani wapechu kaphí richojé. Eko wara'apá Tupana, we'ematajjeri Jesucristo wa'até, la'á piká palá.

Nakaje Pablo wátakare Tito la'aká Creta te'eré nakú yukuna marí

⁵Creta te'eré nakú nuyurí pi'imaká Jesucristo ja'apiyá jema'ajeño wa'até, pilamá'atakaloje nakaje najló rewá penaje. Nuyurí pi'imaká re, pa'akáloje achiñana nakiyana namájeño penaje. Piyukeja pajimila, rewá i'imakare ewá, nuwata pa'aká nanakiyana namájeño penaje. Numaká pijló i'imaká ke nuwátaka pa'aká neká. ⁶Marí ke i'imakaño pa'ajé namájeño penaje: Achiñana nemakarena nakú: “Unká na kalé nala'á pu'uaré”, ke. Pajluwaja lúnaruna kaja neká. Marí ke kaja namájeño yaní i'imajika: Jesucristo ja'apiyá jema'ajeño ne'emajika, unká nemalarena nakú: “Pu'uaré la'ajeño neká”, ke. Palá jema'akaño nach'i'iná ja'apiyá kaja ne'emajika.

⁷Namájeño a'ajeño nanakojó ina'uké, na'akáloje nañathé Tupana wátaka ke la'akana aú. Ñakele marí kajena pa'ajé

namájeño penaje: Unká pu'uwaré la'ajeño kalé; unká kaja najnúcha'alo; unká kaja yúcha'alaño kiñaja; unká kaja yuwéra'alaño; unká kaja wátalaño nókakajo; unká kaja nawajwela liñeru; ⁸kemaño kaja ya'ajnaya iphákañojlo, nayuríkoloje najwa'até nañakaré chu penaje; wéchiruna i'imakaño kaja neká palá la'akaná nakú; we'epiño kaja natukumó palá la'akaná; i'ijnataño kaja palá napéchuwa; palá péchuruna kaja i'imakaño neká; la'año kaja palá, nawe'epíkare nakojé lokópa'alaja. ⁹Nema'ajé kaja palá wewíña'atakare nakú ja'apiyá; kewaka wani riká, napechu i'imakáloje kaphí richojé penaje. Nema'ajé ra'apiyá, newíña'atakaloje ajopana rinaku penaje, nala'akáloje nenakú raú nawe'epíkaloje unká paala, unkachu nala'alá kewákaje puráka'aloji kemaká ke. Ilé ke i'imakaño pa'ajé namájeño penaje

¹⁰Pa'ajé neká Jesucristo ja'apiyá jema'ajeño amájeño penaje, marí ke ne'iyajena ina'ukena i'imakale: Re kajrú ina'ukena unká wani a'alaño nanakojó kewákaje puráka'aloji. Chaje wani judíona nakiyana, unká wani a'alaño nanakojó riká, ñakele unká na penaje kalé napuráka'alo i'imalá, e'iyonaja napajlá kajrú ina'ukena wa'até raú. ¹¹Ina'uké jema'aká piyá na'apiyá, namájeño ja'apátajeño najló kewákaje puráka'aloji. Kaja napichata ne'iyajena ina'ukena pechu nakaje newíña'atakare neká unká wani paala aú. Liñeru chaya newíña'ata neká.

¹²Ilé, pi'imakare e, pajluwa ina'uké i'imari. Nayukupere yukuna i'imajeri penaje ri'imaká. Riká kemari rite'eré eyájena nakú: “Pajlákachina wani Creta te'eré e i'imakaño; yuriná kaja neká; ijnuruna wani kaja neká; kawale'ekena wani kaja neká”, ke rimaká rite'eré eyájena nakú. ¹³Kewaka rimaká nanaku, ñaké i'imakale, pakha'ajé neká, napechu i'imakáloje palá Tupana puráka'alo chuwá penaje, ¹⁴nayuríkaloje naliyó judíona yukupere nakeño'ótakare najluwa ja'apiyá jema'akana. Kaja nayurí naliyó kewákaje puráka'aloji. Neká penájemina jewíña'ataño ajopana nayukupere nakú, nekó nakeño'ótakare najluwa. Pakha'á neká, na'aká piyá nanakojó riká.

¹⁵Palá péchurunajlo palani piyuke nakaje Tupana keño'ótakare; eyá chapú péchurunajlo unká na i'imalá palani, unkale na'alá nanakojé kewákaje puráka'aloji, aphichátakeja napechu i'imakale. ¹⁶Nemá nanakuwá: “Palá péchuruna weká Tupana nakú”, e'iyonaja nakaje nala'akare aú iná we'epí unká ñaké kalé neká. Chapú nawó ajopana cha; unká kaja nema'alá Tupana ja'apiyá; mejluruna ke wani neká palá la'akanajlo.

Kewákaje puráka'aloji yukuna marí

2 ¹Pewíña'atajika ee ina'uké, pi'ijnatá pipuráka'alo palá kewákaje puráka'aloji chuwá. ²Pimá achiñana pheñawa'anijlo, ne'emaká piyá kejátakachina, ajopana iphákalaje na'apí penaje. Pimá kaja najló, ne'ejnatakaloje napéchuwa palá, napechu i'imakáloje kaphí Tupana chojé, ñaké kaja Ripuráka'alo chojé. Pimaje kaja najló, nawátakaloje íki'ija Tupana, ajopana ina'ukena wa'até. Pimá kaja najló, ne'emakáloje kawajwéruna Tupana ja'apiyá jema'akana nakú, namákachu chapú kaje yajwé. ³Ñaké kaja pimájika inaana pheñawa'anijlo, nephákaloje Tupana ja'apí, nala'akáloje piyuke nakaje palá, riwátaka ke. Pimá kaja najló, nachapújra'ako piyá pajwa'atéchaka. Pimá kaja najló, nayuwéra'ako piyá. Pimá kaja najló, nala'akáloje palá, raú namátakaloje ajopana ñaké kaja la'akana aú. ⁴Palá la'akaná aú newíña'ataje ináyana, nawátakaloje íki'ija naluna, nayani, kele penaje. ⁵Palá nala'ajíkare aú namátaje ináyana, ne'emakáloje jápakachina penaje; namátaje kaja neká, ne'emakáloje palá péchuruna penaje; namátaje kaja neká, ne'emakáloje palá naluna ja'apiyá jema'ajeño penaje. Ilé ke inaana pheñawa'aní la'ajika ináyana jenakú, ne'emakáloje palá la'akaño raú penaje. Ajopana pura'akó piyá pu'uwaré Tupana puráka'alo nakú, nala'ajé ilé ke.

⁶Ñaké kaja pimájika walijíamkanajlo, ne'emakáloje jápakachina. ⁷Piká amátajeri kaja neká palá la'akaná aú. Pewíña'atajika neká kewá, piphá wani kewákaje puráka'aloji ja'apí. ⁸Pimá kaja palá nakaje nakú, nemaká piyá pinaku: “Unká paala ripuráka'alo”, ke. Palá la'akaná aú chapú péchuruna wanaku apáña'ajo na'apiwá, unkale na nachapújra'alajo wanaku.

⁹Marí ke pimájika Jesucristo ja'apiyá jema'ajeño, jápaño ajopana wa'atejlo: Pimá najló, nema'akáloje nakariwate ja'apiyá palá, nala'akáloje piyuke nakaje nakariwate wátaka ke penaje. Pimá kaja najló, napiyákaka piyá nanakojó nakariwátena. ¹⁰Pimá kaja najló, nata'aká piyá nakaje naliyá. Ilé ke la'akana aú palá nakariwátena pechu watána'ajika nanakojé, raú kaja nawe'epeje palánija riká wewíña'atakare neká we'ematójari Jesucristo nakú.

¹¹Kaja Tupana la'á pu'uwaká nakaje riwátakare la'akana ina'ukéjloje penaje, piyuke ina'uké i'imakólojejla kapichákajo liyá raú. ¹²Iná i'imaká aú ripalamane, unká iná la'alá apo'ojó ke nakaje rimaká ke liyá; iná yurí kaja pu'uwaré la'akaná iná liyó. Ripalamane aú kaja iná i'imá palá péchuri Tupana wátaka ke la'akana nakú. ¹³Ilé kaje la'akana nakú we'emajé, a'ajná Jesucristo

iphájika majó ejená. Ripa'ajó piño majó, rimaká i'imaká ke. Riwátakana nakú weká maare. Palá wapura'ajiko we'ematajéri, wachi'inárikana wani Jesucristo nakú. ¹⁴Riká taka'arí wachaya i'imaká, raú ri'imatá weká pu'uaré wala'akare liyá. Ri'imatá weká, we'emakáloje rile'ejena ina'ukena, palá péchuruna rijló, wéchiruna palá la'akaná nakú penaje.

¹⁵Pewíña'ata ina'uké marí numakare nakú; pi'imá riyukuna najló, kaphí napechu i'imakáloje raú penaje. Unkaja ke na'á nanakojó riká, pakha'á neká. Nawakára'ajeri piká, marí ke pila'akáloje penaje no'ó pi'imaká; marí ke pila'ajika neká, napechu i'imaká piyá mapéjari keja pinaku.

Piyuke Jesucristo ja'apiyá jema'ajeño la'akáloje palá penaje yukuna marí

3 ¹Pimá kaja pijwa'atéjenajlo, nema'akáloje piyuke nawakára'ajeño ja'apiyá. Pimá kaja najló, ne'emakáloje wéchiruna piyuke nakaje palani la'akana nakú. ²Pimá kaja najló, napura'akó piyá pu'uaré ina'uké nakú; pimá kaja najló, nakha'ákako piyá pajwa'atéchaka; pimá kaja najló, ne'emakáloje ina'uké wani piyuke ina'uké wa'até, eyá nala'aniña nanakuwá ajopana chá'atajeño ke piyuke ina'uké wa'até.

³Re ina'uké nakiyana unká wani napechu i'imalá najló palá. Ñaké kaja we'emaká júpimi, kapichájeño penájena we'emaké wakajé. Pu'uaré wala'ajika; unká paala wala'ajika; unká kaja wema'aké Tupana ja'apiyá; wéchirunaja we'emajika pu'uaré la'akaná nakú; unká ina'ukélaruna kaja we'emajika; chapú kaja wapechu i'imajika ajopana ina'ukena nakú, nachá'atajikale weká. Ñaké kaja napechu i'imajika wanaku chapú. Ilé kajé aú wapechu i'imajika chapú panakuwáaka. ⁴E'iyonaja we'ematajéri Jesucristo we'epiri wamu'ují. Wawe'epí íki'ija wani Tupana wátaka ina'uké, ⁵aú kalé riwe'epí wamu'ují, ri'imatá weká kapichákajo liyá rijluwa. Unká na kalé wala'á palá, ri'imatáloje weká penaje, e'iyonaja kalé ri'imatá weká kapichákajo liyá. Rika'á kaja wanakiyá pu'uaré wala'akare; ra'á kaja wajló Ripechu, we'emakáloje wajé péchuji chuwá penaje. ⁶Jesucristo palamane aú Tupana a'arí wajló Ripechu, we'emakáloje palá wani ra'apiyá penaje. ⁷Ripalamane aú palánija weká me'etení Tupánajlo, we'emakáloje rijwa'até matajnako je'echú chu raú penaje. Riká wátakana nakú weká me'etení.

⁸Kewaka wani marí nakaje numakare nakú, ñakele nuwata pila'aká nenakú, nawe'epíkaloje rinakojé palá raú. Pi'imá kaja

Tupana ja'apiyá jema'ajéñojlo riyukuna, ri'imakáloje napechu nakuja penaje, nala'akáloje palá ajopana ina'ukena raú. Marí ke la'akana palani piyuke ina'ukénajlo. ⁹Pipura'aniño najwa'até mapéjari puráka'aloji nakú. Re nayukupere, nach'i'iná michuna yukuna, nakha'ákono pajwa'atéchaka Moisés puráka'alomi jimaje. Unká na penaje kalé nakaje napura'akaro nakú i'imaká.

¹⁰Re ka'ajná apú ijwa'até, apichátari inakiyana pechu ripuráka'alo aú. Eko pimá rijló, riyuríkaloje riliyó riká. Pimá rijló rinaku pajluwape, iyaampe ka'ajná, unkaja ke rema'á pa'apiyá, pácho'ota riká inakiyana e'iyayá. ¹¹Kaja piwe'epí ilé kajena ina'ukena pechu la'akó apo'ojó, nayuríkale kewákaje puráka'aloji naliyó. Pu'uwaré nala'akare aú iná we'epí Tupana wajájikarena penájena neká.

Kaja penaje Pablo kemakare nakú Títojlo yukuna marí

¹²Nuwakára'aje ilé ka'ajná Artemas ka'ajná, Tíquico ka'ajná. Riphájika ilé ño'ojó lanakiya, pi'ijnajé majó nomaje pajimila Nicópolis ejo. Pila'á mawó pikó, pi'ijnakáloje rejo penaje. Rewá nuwata i'imakana yawijá i'imajika ketana. ¹³Eko pa'á Zenas, Apolos, kele ñathé. Ina'uké chaya pura'ajero Zenas. Eko pa'á najló nakaje nawátajikare kaje, nala'aká piyá kamu'ují nakaje nakú na'apájika ewá. ¹⁴Eko pimá pijwa'atéjenajlo, na'achí ina'uké ñathé nakaje nala'akare kamu'ují nakú aú. Ilé ke la'akana aú pijwa'atéjena la'ajeño palá, unká ne'emalaje mapeja marí eja'awá chu.

¹⁵Piyuke nujwa'até i'imakaño maare kemaño pinaku: “Eko palá rijló ka'ajná. Eko palá kaja Jesucristo ja'apiyá jema'ajeño re i'imakáñojlo”. Pajñakani wema'aká Jesucristo ja'apiyá najwa'até. Nuwata Tupana la'aká iká palá piyukeja.

Kaja.